

Jochen met det loahme Been
 Bläst de Trumpet' ossig schön;
 As he noch de Post musst' föhr'n,
 Leet he sick nich bätter hör'n.

Kinner, Kinner, hört moal an!
 Nich getögert! koamt heran!
 Heissa, lustig, hopsasa!
 Lirum, larum, tralala!

Unn doa koamen Klein unn Groot,
 Wat män ichtens is to Foot,
 Boor unn Kotzer, Knecht unn Deern,
 Schult unn Schöppen ook von färn.

Doato kümmt de wille Jagd
 Ut de School' noch angelacht:
 „Lött in't Dörp Musik sick hör'n,
 Könn' wi so wie so nüscht leer'n!“